



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Pakistan Election Commission dangi Imran Khan aru

Jamshedpur FC-i Japan nunger Midfielder Rei Tachikawa alizükogo



VOL. XX NO. 283 (ADOK 283) DIMAPUR RASEMNÜ (WEDNESDAY) CHITENI (JULY) 26, 2023 ₹ 5.00

Parnok nuktzü agi ni memejangdaksür: DCW chief

New Delhi, Chiteni/July 25 (Agencies): Manipur nung tashiyim agi mangsa anir senzüba tetsür ana indang kinungertem den Mongulbarnü Delhi Commission for Women (DCW) tekolaki ajurutepe liasü aser tang tashi parnoki state nungi counselling mesüra compensation kecha magütsü aser temolung kanga yirua aoksar lir ta ashir.

DCW tekolak Swati Maliwal ya tang Manipur semdangba mapang lir aser lai Churachandpur, Moirang aser Impgal district temi oa relief camp tem semdang aser azüdokshi nungi jenbua alirtem den sensaksema liasü.

Mangsa yimtung nung anir senzüa tashiyim amshir ano kabo nisung telok kati tashiyim amshia shi nung medem, ta osang ajanga ashir aser Maliwal-i tena indang tetsü aser kinungbo ajurua liasü.

Parnok ya tim mesü amshiba nungi kumzüksü merangba mapang tashiyim amshia nisung telok kati shi nung medemla tetsü indang kinungbo aser par jabaso ka asü, ta DCW sangdong ka ajanga ashi.

Mangsa anir senzüa tim masüba mapa inyakba tetsüra kinungbu ta linük asoshi Kargil war nung raraogo, ta sangdong ajanga ashi.

"Manipur nung reshikangshi timtem ajurur aliba jala ana kinungertem ajuru... Par nuktzü agi ni mapang talangka memejangdaksütsü. Tanü tashi parnok ajurui shinga arua mali," ta Swati Maliwal-i tweet ka nung ashi.

Fibre internet nokdangba agienogo

Azüdokshi agi kongshir aliba Manipur state nung internet

services tera lapokogo. Manipur nung fibre networks ajanga internet services tanaben agütsür

Manipur High Court-i ILL aser FTTH ajanga internet services tanaben agütsütsü totuyuba agütsüba sülen fibre internet services nokdanga aliba agientsü.

Ajisüaka Manipur nung mobile internet services tem maneni shibanga lir.

T Ranjit Singh, Commissioner (Home), Government of Manipur ajanga Mongulbarnü (July 25) totuyuba ka agütsüba nung, 'terms and conditions' kar agüja aliba ama inyaka broadband service (ILL aser FTTH) ajanga internet services agütsüba nokdanga aliba agiener, ta shia liasü.

Azüdokshiba, ki o jen raksatsüba aser prangbong agi khatepba ajanga Manipur sorkari May 3 nungi tenzüka tanen makai July 24 tashi internet shibangtsü totuyuba agüja liasü, ta ashi.

Manipur High Court ajanga July 9 nü state ketdangsür dang züngsem 12 agi tentetba expert committee ajanga ashiba ama ajaki inyakra Internet Lease Line (ILL) aser Fibre To The Home (FTTH) indang internet nokdanga aliba lapoktsütsü totuyuba agütsüba ama state sorkari inyak.

Manipur nung internet tanaben lapoktsütsü atema Airtel, Reliance, Jio, Vodafone aser BSNL densema telok balalai public interest litigations (PILs) benokba sülen iba totuyuba ya Justices Ahanthem Bimol Singh aser Guneshwar Sharma nati agüja liasü.

Meitei aser Kuki kin tsüngta mangatetep adoka azüdokshiba ajanga Manipur nung ita asem jungnüa internet shibangja liasü.

Dimapur nung ITCS amshi tenzükogo



ana nung inoka aliba ITCS yagi traffic signal light tem nisungi azüoktsü.

Iba system nung takok ngura onoki jila kübok danga lemjem tem nunga inoktsü sentong lir. Onoki intelligent traffic control system room ka amenoktsü sentong yanglur, aser iba room nungi yimi nung aliba traffic ajunga nüka reprangtsü, ta Commissioner of Police, Sophie-i ashi.

Pai Dimapur nung aliba nübur ajunga aser senzüsemponger tem dang iba project takok ngudaktsütsü atema traffic oziung aser signal lights sülen anidaktsü ayongzüka liasü.

ITCS benokba atema Member Secretary, Nagaland Pollution Control Board & State Nodal Officer, NCAP K Hukato Chishi ajanga Dimapur police dang pelaba lemsatetep aser iba yagi traffic gari senzüba tajungba nung azüokba kisüng masü saka mopung menenba nungia azüoktsü, ta ashi.

Dimapur, Chiteni/July 25 (TYO): Commissioner of Police, Dimapur, Kevithuto Sophie-i Mongulbarnü National Clean Air Programme (NCAP) kübok Holy Cross Traffic point aser Nagarjan Traffic point nung Improvised Traffic Control System (ITCS) semzükja liasü.

Iba system semzükba sentong nung jembidang Sophie-i ashiba agi, kanga mazüngi aliba lemjem

Nagaland sorkari UCC memolunger, ENPO den lir: Minister Kenye

Kohima, Chiteni/July 25 (TYO): Nagaland sorkari state nung Uniform Civil Code (UCC) mapa kuma amshitsü memolunger aser Law Commission of India dang iba ozüing küboki Nagaland maitdaktsütsü ajungshio, ta Hombarnü Minister, Power & Parliamentary Affairs, Government of Nagaland, K G Kenye-i ashi.

Law Commission ajanga June 14 nü sangdong ka nung, nüburtem aser tamangba yimsü tsütsü tentet balala densema stakeholders tem dang UCC mapa kuma amshitsü atema shisa lemsateptsü shia liasü.

Hotel Japfu, Kohima nung osangbener senden ka nung jembidang, nüburtemi bilemba angateta UCC indang Law Commission ajanga June 14 nü nüburtem dang sangdongba nung ajemdaker July 4 nü ministerial team kati UCC mapa kuma amshitsü aliba nungi state metendaktsütsü atema temepishiba ka agütsü, ta pai ashi.

"Asen nüburi UCC ya magizük aser iba amala ozüing benoktsüa anema nokdaker aser lokti tentet balalai tejashi lemsatetepa yimjak nung UCC magizüktsü sangdongba liasü," ta pai ashi.

Iba team yagi Union Home Minister Amit Shah ajuru aser paia UCC küboki Khristanpur aser tribal state kar maitdaktsütsü Centre-i asadanger ta langzü, ta Kenye-i ashi.

Constitution of India nung Article 371 (A) inokba ajanga Nagaland ya linük nung state 16 buba akum aser iba arila yagi Naga nunger tamangba mesüra sobaliba tsütsü yimsü balala; customary law aser inyakyim; civil aser criminal justice indang administration nung Naga customary laws den apet telemtetba agitsü; aser ali aser yangji aliba rongsen nung kibur akumtsü aser belenshitsü waziüka yutsür, ta pai ashi.

"Iba amala yimya ya asen customary laws, loktiliba aser tamangba yimsü tsütsü timtem lir ta asenoki angatetep yong state sorkari July 4 nü Law Commission nem ibaji agütsü,"

ta pai ashi.

Uniform Civil Code ya kiyimba, kibong bala-lulaba aser senmangren nung ozüing kasa amshitsü indang lir aser ibai tamangba yimsü, kin mesüra sobalibaren balala mebendangi India nunger senso ajak atema lir.

Law Commission ajanga June 14 nü nungi UCC indang shisa agitep asendenshir tenzüka lokti tentet balala nungi pei tangatetba meshir.

"Nagaland state ngur küm 60 tashi liyonga arudang tanü tashi asenoki rongrongshirong, mepetmesü aser azüdokshi ajangshia arur aser telung nunga aser tema nunga tayongzükbatem balala lir. Yimjung ken o jembibaa küm ter dak tema atsülanga arur aser tang tashi tejangja ka monguteti lir. Item tensa ajak agi müketbanger onok mejangjaba tzü nung senzür ta sorkari Commission nem agütsüba nung shia lir," ta pai ashi.

Centre-i iba tangatetba nung nokdaktsü aser Constitution indang Article 371 (A) nung aliba ama Uniform Civil Code mapa kuma amshiba nung Nagaland medendaktsütsü imlar, ta Minister Kenye-i ashi.

Eastern Nagaland Peoples' Organisation (ENPO) ken o dak sendakba nung Kenye-i ashiba agi, Centre-i ENPO nem 'entity' tasen ka agütsüba nung state sorkar aser tanüingba nüburtemi anema menokdaker, anungji tang nungi tenzüka tangatetep tatem kati arutsü atema telok asem tsüngta jembishinü asütsü.

State sorkar kodanga ENPO-i akhangba anema meliasü aser 2011 nunga state-i Government of India dang ajaki molungtepa aser timi jembishinütetra, state anüdoklen entity tasen ka atema anepalu sütettsü ta shia liasü, ta pai ashi.

"Onok June-July ita Delhi-i maodangbo Ministry of Home Affairs aser ENPO tsüngta dang jembia liasü aser shinga tetsüngtai mai. Saka ENPO tesem ya state nung shilem ka asünung aser geopolitical jurisdiction ya tang aliba Nagaland state küboki aiter asünung, sorkar aser state nung tanüingba nüburtemi iba jembishinü nung terenlok aliba

metettsü kanga yongya lir," ta Minister Kenye-i ashi.

Eastern Nagaland nung aliba nüburtemi jangraba anema state sorkar menokdak saka yaritepa sorkar tangatetba lemsatetep aser iba state nung shilem ka indang ken o jembidang state sorkar madentsü kuli maka, ta pai ashi.

"State sorkar kodanga parnoki akhangba anema meliasü," ta Kenye-i ashi.

Mapang süitema aodang state tesem balala nung aliba nüburtemi iba jembishinü osang angashitsü kanga yongya atar aser parnoki metettsü langa lir, anungji state sorkar aser tanüingba nüburtemi iba ken o nung tammang tia nung yutsüba ya MHA aser ENPO tai lir, ta pai ashi.

"Nisung shingia iba ken o anema menokdaker saka ajaki iba ken o dak sendakba inyakyim metetner.

Asenoki memimshitsüla, kechiaser ibai state nung aliba nübur ajak indang tang aser tarutsü asoshi lir."

Anungji jembishinü renloka aoba metettsü asoshi state sorkar tetsüng ajemok.

Sentong tasenba atema 'final draft' ya renemer asü ta asüngdang dang, state sorkar tetsüng majemokdang nüngdakba ajak jembishinü süogo aser ken o tatem leni arur, ta temaba jenjang nung iba ken o ketdangsür temi ashir ama state sorkari angateter, ta pai langzü.

Iba ken o tatem kati arutsü asoshi mapang tenzüktsü aser tang nungi Centre, State aser ENPO tsüngta jembishinütsü, ta Kenye-i ashi.

Inyakyim tatembangba taruba ita nungi tenzüktsü saka tang tashi entity tasenba atema nüngja-koja, structure aser status indang tolong junga marui lir, ta ashi.

ENPO nem Frontier Nagaland State, Union Territory, Autonomous/Territorial Council agütsütsü atema tebilemba balala lir saka kecha tatem kati maru, ta pai ashi.

Nüngja-koja nung Naga masü Nagaland ojang adentsü state sorkari ajungshitsü, kechiaser Nagaland state alema orra Naga nungertem lir, ta pai ashi.

P & NG atema Ministerial Group tentetba nung temolung masür: WSH

Dimapur, Chiteni/July 25 (TYO): Chief Minister-i anir tawa Ministerial Group on Petroleum & Natural Gas (2023-2028) tentetba nung Sumi legislator kata medensemba atema kanga mepelar aser aoksar, ta Western Sumi Hoho (WSH) sangdong ka ajanga ashi.

Ibai Sumi nunger bendanga amshiba yimya ka aser Sumi nunger asoshi mezüngmeshi lir. Western Sumi area ya

Dimapur, Niuland aser Chümoukedima nung shilem tululu lir, kong ali rongsen, talisa petroleum aser gas peria moaja lir, ta sangdong ajanga ashi.

Iba mera ya tebilemba tamajung nung agiba aser Sumi nungertem telemtetba agiba nung medendaktsütsü mapa tamajung inyakba aser state nung iba ama tongtipang projects nung onok medendaktsütsü merangba lir, ta ashi.

Anungji state sorkari telemtegba reprangshia iba telok nung Western Sumi area nungi Sumi legislators ka inoktsü ajungshir, ta WSH sangdong ajanga ashi.

Yamaji meinyakra Western areas nung aliba Sumi nunger temi onok alidak petroleum aser natural gas dak sendakba terenlok mapa anema nokdaktsü aser ibaji state sorkar khuret asütsü, ta WSH sangdong ajangasa ashi.

Mezüngbuba KAPT inti senden menogo



Kohima Ao Pensioners Union ketdangpurtem den tejaokertem mezüngbuba KAPT inti senden mapang tangokba noksa nung angur.

Dimapur, Chiteni/July 25 (TYO): Kohima Ao Pensioners' Union (KAPT) mezüngbuba inti senden July 25 nü Jubilee Memorial Centre, Lerie, Kohima nung agiogo.

Iba senden nung Alemtemshi Jamir, IAS (ret'd)-i o jembiba mapang, retirement sülen taküm tenzüker aser pension ya taküm nung jenjang tasen ka agiba temaitsü lir, ta ashi. Jamir-isa, medical, pharmacological technologies renloka aoba aser nutrition tajungba akümba ajanga average life expectancy timba kümdaktsüogo aser iba ajanga mapa nungi anener alirtem taküm arishi küm ter nungi terpongu tashi alitsü asoshi maongka agütsür, ta ashi. Paisa, mapa nungi anenba

sülen langka tasen tenzüksü aser nüburtem tenzükbawadang nung nokdaka aliba mapang tajangshibatem aser shisatsü bendenbatem amshia lokti nem teyari agütsütsü asoshi maongka angur, ta ashi. Advisor Land Revenue, Law & Justice T.N. Mannen, IAS (Retd)-ia iba sentong nung o jembiba mapang, mapa nungi anenba ya tebilemdangba ka dang lir aser nisung ka shitemang anema dang lira lokti tenzüka temelenshi bener arutsütsü asoshi küm tatakzük kecha mali ta ashi. Paisa, taküm ya liyonga aotsüla ta shia, nisung ka public office toktsür pension tajangzük agia maneni lokti asoshi inyaktetsüsa mapang ka tongtetba ya jangrademtsüka ta

ashi. Sentong nung KAPT tir tasenba Dr. Watijungshi-i lokti pela agizükba o jembiba aser Kohima Ao Union tir Yanger Aier-i Kohima Ao Union tenüng nung salem osang lemsatepa liasü. Kasa mapang nung KAPT General Secretary Limawati Longchar-i KAPT indang temzüng ozüng züngsemtem nem metetdaktsü, koba züngsemtemi ajaki mulunga agizüka Kohima Ao Pensioners' Union ya officially tenteta liasü. Union tasenba nung züngsem 500 dak tema lir aser iba Union nung Kohima nung aliba Aoer shirnok sorkar mapa nungi anener lir parnok ajak tentettsü.

Noklak DC-i ILP agütsüba indang metetdaktsü

Dimapur, Chiteni/July 25 (TYO): Noklak Deputy Commissioner Arikumba-i July 24 nü sangdong ka ajanga, Village Councils/Ward ketdangsürtemi kari state sorkari memeteti Inner Line Permit (ILP) agütsüba ya ozüng alema ta metetdaktsüogo.

Kasa sangdong ajangasa,

ILP enforcement aser regulation ya Bengal Eastern Frontier Regulation, 1873 kübok aliba ama District Administration-i dang inyaksangshitsüba maparen ka lir, ta metetdaktsü.

Iba dak sendakba nung Deputy Commissioner-i, Village Council aser Ward ketdangsür

ajak dang ILP agütsüba mesüra iba dak sendakba inyakyim kecha nunga shilem magitsü atema tetuyuba agütsüogo. Pai ashiba agi, ILP indang ken o ya District Administration-i dang achaayangtsü, ta ashi. Maneni iba tetuyuba sülen tashi anga anidaktsü atema sangdong ajangasa metetdaktsüogo.

Dimapur police-i achaayanga assistive device lemstsü



CPs office Dimapur nung July 25 nü Daisy Player lemstsüba sülen tenla agütsürtem aser tanurtem tangokba noksa nung angur.

Dimapur, Chiteni/July 25 (TYO): Tangar dang nungi teyari tali nungdaka aliba tanurtem nungdak ya kjenyongi balaka lir. Teyari tera agütsüba aser education shidak agütsüra parnok timbaka taküm nung peisasa ayanga litettsü.

Iba ya temulung dang yur aser sepaitem ya nüburtem aser tanurtem tembar ta sayutsü nükjidong nung Dimapur Police-i, wadang balala nungi tanga ketdangsürtem aser NGO tem longjemdaktsütsü atema inyakyim ka tenzük aser item nisung aser lokti tentettem yagi

tenük poker aliba tanurtem atema assistive device tem alitsütsü asoshi teyari agütsüogo.

Daisy Player ta nungja agütsür aliba device ka July 25 nü CPs office Dimapur nung Dimapur District kübok sorkar school 4 nungi tenük poker aliba kaketshir 17 nem lema agütsüogo, shirnok rongsenketzüng nung tekübokba jenjang nung alirtem lir.

Daisy Player ya wi-fi enabled device ka lir, kong E-book reader, MP3 Player, Voice Recorder, radio & podcasts aser bookshare & Sugamya

Pustakalaya amala online library tem densema lir. Iba device ya English aser Hindi aser India nung oshi 11 nung amshitettsü. Iba yagi class room nung angazükba nung tongtibang shilem ka agir, kong kaketshirtemi tesayubatam mangaoka yuteter aser Braille agi convert süteter.

Iba inyakyim atema tenla agütsüba kija aser lokti tem rongnung Lt Col Vivek Kler, AR, Innerwheel Club, Dimapur Bharat Laxman Markad, IPS, SP Phek aser CP Dimapur nung densema lir.

NBSE-i HSLC & HSSLC tatidang indang metetdaktsü

Dimapur, Chiteni/July (TYO): NBSE-i sangdong ka ajanga HSLC & HSSLC Examinations 2024 nung shilem agitsü atema tejangraba aliba Regular Repeaters aser Centre Repeaters ajak dang HSLC atema August 1 nungi August 12 aser HSSLC atema August 8 nungi 12 tashi nung pei institutions/examination center tem den tongteprateptsü metetdaktsüogo.

Iba dak sendakba nung Institution tekolaktem dang,

NBSE portal nbsenl.edu.in ajanga Online Application form filling up asüba nung candidate tem nem teyari agütsütsü aser candidate tem dang parnok indang application form tem verify asütsü aser Board nungi temelaba agitsü atema portal ajanga yoktsü asoshi tatidang taah agütsütsü atema osang agütsütsü metetdaktsüogo.

Form fill up süa benoktsü atema temzüng ozüngtem @ nbsenl.edu.in nung angutsü ta metetdaktsüogo.

Sovima nung Workshop den repsema Training sentong agiogo



Dimapur, Chiteni/July 25 (TYO): Waste Management aser Ban on Single-Use Plastic dak sendakba nung July 25 nü Sovima yimtsüng Council Hall nung Workshop den repsema Training Session ka agiogo. Iba sentong ya Nagaland Pollution Control Board den longjemer Tribal Welfare Society-i ayongzüka agiogo.

Sentong nung o jembiba mapang, NPCB Member Secretary K. Hukato Chishi, IFS-i, asenoki jana shitak intoktsü metetra aser khen dang amshiba plastic bag tem amshiba anenba den libaliro nung temelenshi tera bener arura, jana agi timtem agütsüba koktettsü, ta ashi.

Paisa, khen dang amshiba plastic osettem ajanga ali aser tzüyim menenja timtem agütsüba indang lemsatep. Khen dang amshiba plastic osettem ajanga alima menentsüba ya tetsükdaktsü tulu ka kümogo aser iba ajanga linük ajunga dak kongshio, ta ashi.

Maneni pai, iba dak sendakba

nung tangazükba agütsütsü nungdakba lemsatepba den nüburtemi shilem agiba aser stakeholder tem ajaki shilem agia jenjang tapet agiba ajanga dang ministry-i nükjidong ayuba ama Khen dang amshiba plastic osettem ya nokdangtettsü, ta ashi.

Sentong nung lokti pela agizüba o jembiba maoang Zumvü-i, "Grow Tree, Plant Tree" onük dak ajemdaker jembiba aser parnoki taoba küm süngtong meyrejang aika atemba aser shi akhaba nokdangba indang lemsatepa liasü, koba ajanga yimtsüng nung temelenshi jenti adokogo, ta ashi. Paisa, waste management dak sendakba nung department-i lenmang sayutsü aser khen dang amshiba plastic osettem nokdangtsü asoshi jenjang agitsü asoshi yongya ataba lemsatep. Iba den bendenloksema pai sorkar dang Sovima yimtsüng ya model village ka ama adopt asütsü mepeshia liasü.

NBSE-i Project Veer Gatha 3.0 indang metetdaktsü

Dimapur, Chiteni/July 23 (TYO): Nagaland Board of School Education-i sangdong ka ajanga, Board kübok züngoksema aliba Institution tekolak ajak dang, Ministry of Education (MoE) den longjemer Ministry of Defence (MoD)-i, 2023-24 küm Project Veer Gatha 3.0 amenoktsü asoshi telemtetba agiogo, ta metetdaktsü.

Project Veer Gatha ya, kaketshirtem nem Gallantry Awardees aser parnok taküm otsü metetdaktsütsü nükjidong nung 2021 küm Gallantry Awards Portal (GAP) kübok tenzüka liasü.

Project Veer Gatha-isa, gallantry award angurtem dak ajemdaker creative projects/activities tem inyaksü atema kaketshirtem nem sabang agütsür. Iba sentong nung shilem ka ama kaketshirtemi

gallantry award angurtem dak ajemdaker poem/paragraph/story/drawing/video amala project balala inyaktettsü. Jenjang ajak; District Level, State aser National level nung takokertem alitsü. National Level akoker nem Ministry of Education, Government of India aser Ministry of Defence, Govt. of India-i Delhi nung tetushi agütsütsü. District aser State nung takok angurtem ajak pei District aser State nung tetushi agütsütsü.

Iba dak sendakba nung züngoksema aliba Institution tekolak ajak dang Project Veer Gatha indang metetdaktsütsü aser entries ajak MyGov Portal nung upload sütsütsü tetuyuba agütsüogo. Osang tejangjaba agitsü atema school temi links: www.gallantryawards.gov.in semdangtettsü.



July 25, 2023 nü New Delhi nung Parliament kima Parliamentary Affairs Minister Pralhad Joshi, Union Law & Justice Minister Arjun Ram Meghwal aser Minister of State for External Affairs V. Muraleedharan nungeri osangbenertem den jembidang tangokba noksa nung angur.

PM Modi-i Manipur tensa atema sangdong agütsütsüla: Kharge

New Delhi, Chiteni/July 25 (Agencies): Mongolbarnüa Congress party Tir, Mallikarjun Kharge-i Ato kilonser, Narendra Modi dang Parliament House anaprongla nung Manipur tensa dak sendakba nung sangdong agütsütsüla, ta takhangba agütsü.

Rajya Sabha nung Opposition Lenir, Kharge-isa, northeast tesem ajaklen nung tensa mejungi akümtsüsa lir, aser Manipur nung rara ya tanga state tem nunga prokshir ama reprangteter, aser iba ya linük arrtsülen aliba state tem atema majung, ta ashi.

Kharge-i, Manipur nung anogo 83 tashi raraba dak sendakba nung Ato kilonseri

sangdong tejangja agütsütsü nüngdak, ta ashi.

Pai twitter ajanga, "Taoksatsü otsütem tanemtanemi jungkai adokdar. INDIA (opposition teloktep)-i Manipur rara atema Modi sorkar dang nungi telangzüba meshir," ta metetdaksü.

Kharge-i, joko Modi-i mezümeküm mesüi Manipur atema linük dak tamang kakettsü mapang tongogo, ta ashi.

"Ato kilonser Modi-i Manipur nung tensa tajungba akümtsü atema par sorkar kechi inyakerar metetdaksütsüla," ta Kharge-i metetdaksü.

Mongolbarnü Rajya Sabha nung rule 267 kübok Kharge-i

adjournment notice ajanga, anogo piyong atema renema aliba onüktem toktsütsüla aser Ato kilonseri senden nung sangdong ka agütsütsüla, ta ashi.

"Ato kilonseri anogo 80 jungnüa Manipur atema meinyaker aser sendoker. Home Minister-i iba tebilemtsü akoktsü atema kecha meinyaket aser pai state semdangyonga yimjung bener marutet," ta notice nungji shia lir.

Parliament House anaprongla nung opposition party temi Manipur tensa atema Ato kilonseri sangdong ka agütsütsüla sülen ang iba onük nung o lemteptsü, ta takhangba agütsür.

Küm ana tsüngda J&K nung sepaitemi LeT kiralongrar 79 tepsetogo

New Delhi, Chiteni/July 25 (Agencies): Tesüiba küm ana tsüngda Jammu & Kashmir nung security sepaitemi Lashkar-e-Taiba (LeT) kiralongrar 79 tepsetogo, ta Mongolbarnü ketdangsertem osang ka ajanga metetdaksü.

Taküm Jammu & Kashmir nung security sepaitemi kiralongrartem mita aoba mapang nung kiralongrar 35 tepsetogo; parnok 27 maitsübo mejangja saka kiralongrar pongubo The Resistance Front (TRF) telok nungi züngsemtem liasü.

"2022 küm kiralongrar 129

tepsset; lisopur kiralongrar 93 aser bendanger kiralongrar 36 tepset. 2022 küm nungbo kiralongrar ka indang maitsü ang mejangjateti liasü saka 2023 küm nungbo July ita tashi nung maitsü 27 mejangjar," ta ketdangser kati metetdaksü.

Kashmir vally nung kiralongrar telok aika lir, aser item telok rongnung Hizbul Mujahideen, Tehrik-ul-Mujahideen (TuM), Al-Badr, Ghazwat-ul-Hind (AGuH), Islamic State Jammu and Kashmir (ISJK), Lashkar-e-Mustafa (LeM) aser Pakistan nung amenoka aliba Lashkar-

e-Taiba telok atema inyaksüba telok- The Resistance Front (TRF) lir, ta ketdangseri metetdaksü.

"Taküm onoki kiralongrartem linük telungi aittsü merangba aika nokdangtetogo aser tatalokba balala nung onoki kiralongrar 35 tepsetogo, aser parnok rongnung bendanger kiralongrar 27 densema lir," ta ano tanga ketdangser kati metetdaksü.

"Security aser intelligence agencies-i kanga meranga inyakba ajanga lisopur kiralongrartem kanga ajema kümogo," ta paisa metetdaksü.

Gujarat nung aayangertemi anguba honjandi aika MP police-i auya

Alirajpur, July 25 (Agencies): Gujarat nung ki tejen ka bendokdang aayangertemi akhidang British nung yimsüsüba mapang nung amshiba honjandi 240 nguteta liasü; sensaker aayangertem jagi senji Madhya Pradesh-i bener ao saka yangji police pezüi auya.

Jandi (senjang) shiaji sen lakh 3-4 shi asütsü.

Jandi auyar police ajak samaogo aser iba tatalokba bushisüngdangtsü atema Madhya Pradesh Police-i special investigation team (SIT) ka tentetogo.

Madhya Pradesh kübok Alirajpur district nungi Ramkubai-i police dang, Gujarat kübok Navsari district nung la den lar kibong züngsemtemi aayanga ki tejen ka bendoktsüba mapang nung honjandi aika ngua liasü, ta metetdaksü. La ket nung honjandiji kabo liasü.

Honjandiji 1992 küm British nungeri menünga liasü; jandi shia touzük gram 7.08 lir aser

jandi nungji King George VI noksa ajenloka lir. Jandiji shilem 90 bo hon lir.

Ramkubai-i honjandi 240 pronglaji Madhya Pradesh nung lar yimdaki (Bajda) bener aoba sülen ki telung nung ali tur rema ayu, ajisüaka July 19, 2023 nü Sondwa police station nungi police ketdangser, Vijay Devda den constables- Rakesh, Virendra aser Surendra nung arua parnok amokmerenba sülen janiji tuteta bener ajen.

July 20 nü police-i police pezüi anema FIR ka benok aser parnok ajak mapa nungi anentsüogo.

Tang London nung telidak, Imtiyaz Baliya-i aayangertem dang Gujarat nung par ki tejen bendoktsü atema metetdakja liasü; ajioda aayangertemi ki bendokba mapang nung honjandiji angu.

British nung yimsüsüba mapang nung amshiba honjandi nungji 'one mohar' mesüra 'two mohar' ta ajenloka lir aser item jandiji ka nung sen lakh 3-4 jenjang lir.

SUGATA SRINIVASARAJU

STRANGE BURDENS

THE POLITICS AND PREDICAMENTS OF RAHUL GANDHI

Kaketzülor, Sugata Srinivasaraju-i züluba kaket 'Strange Burdens' noksa nung angur. Iba kaket nung Congress lenir, Rahul Gandhi-i 2004 küm March ita nung official süa yimtenren nung ajemokba mapang nungi tenzüka 2023 küm January ita nung 'Bharat Jodo Yatra' tembangba tashi ayimjema lir.



July 25, 2023 nü New Delhi nung Ato kilonser, Narendra Modi BJP parliamentary party senden nung adentsü arudang tangokba noksa nung angur.

July 1 tashi nung India nunger nütsüng crore 139 shi lir: Centre

New Delhi, July 25 (Agencies): July 1, 2023 anogo tashi nung India nunger nütsüng crore 139 shi lir, ta Mongolbarnü Lok Sabha nung Ministry of Health & Family Welfare-i metetdaksü.

Lok Sabha senden nung Union Minister of State for Home, Nityanand Rai-i, United Nations, Department of Economic & Social Affairs, population division online publication aser World Population Prospectus 2022 apibo July 1, 2023 anogo tashi nung China nung nütsüng 142,56,71,000 lir, ta metetdaksü.

Tezüluba nung tasüngdangba ka langzüdang Union Minister, Nityanand Rai-i, "Ministry of Health & Family Welfare kübok National Commission on Population indang technical group on population projections apibo July 1, 2023 anogo tashi nung India nung nütsüng 139,23,29,000 lir," ta metetdaksü.

Central sorkari Census 2021 agitsü atema March 28, 2019 anogo nung sangdong agüja liasü, ajisüaka coronavirus wara ajanga Census 2021 aser iba dak sendakba maparen ajak thinena liasü, ta paisa metetdaksü.



TIR YIMYIM YIMOBILEM (EDITORIAL)

DIMAPUR RASEMNÜ, CHITENI (JULY) 26, 2023

Ola madokba ya akhi masü !

Manipur nung lendong ataloker, joko, anogo 80 ajunger saka linük nung ato kilonser Narendra Modii ola madokba ya tajungtäzä masü. Atangji, Manipur lendong mapang atalokba video noksa ka nung lokti tului tetsür ana mangsa anir jajaba ngua paa tejashi maremtet second ishikabo ola adokogo. Ajisüaka, linük nung lendong pateka ya ataloka yur, iba indang ojang ka ta mashiba jagi Manipur lendongji pa atemabo meimlaba mapa ka ataloker masü amai sayur. Aji oda, tang tashi ato kilonseri Manipur lendong nung nisung asüba, telidak ki dang masü saka tenla ki rongtsüba aser nisung meyrirjang aika talidak maka 'refugee' kümer relief camp-tem nung timtema aliba indang pa bang nungi ola kata madokbaji shisabolutsüka lir. Ibaji kodang jungjunga bilemdangdir, ashiko, Manipur nung atalokba lendong ya tetenzüker dang asütsüa akok, ano iba dang nungi tuluba ataloktsü nung koda? Mekurai liang ta ashir amai dang shisabolua bilemer. Ashi, Manipur nung atalokba lendong yaribo, tangar shingaia masüngdangdangyongi ato kilonseri tama anogo shia osangbenertem jaoka metetdaksünütsüka aser tatar senden nunga tangari masüngdangdangyongi pai tama mapang meshir jeminütsüka. Aji oda, tang Manipur nung atalokba ama linük nung lendong tulu atalokaka, kecha hau ta mali, tanga nungdak dang jajabaji Manipur nungertem asoshi dang masü saka linük nübortem ajak asoshi lendong lir. Linük nung alir nübortem asoshi kanga taoksatsüka saka BJP lenir asoshi kanga taoksatsüka masü, aji kechiba? Atangji, lendong ataloker külen kilo kilonser Amit Shah-bo Manipur tonga oagi yipzüka mongogo. Ajisüaka, pa aoba agiang tensa tamajungba aküm amai tanü tashi lendong atalok manener aser mangyimer kibong aika pei tsürabur aser chirnur mang abeni dena moutet tetsübu tia nung lir. Amit Shah-i inyakbaji Manipur Chief minister-i anir 'Peace Committee' ka shim, saka iba committee-ji mapa küma moutet. Iba kolok aser iba tangatetbaji dang kilo kilonser daka liasü. Manipur nung lendong atalokba ya Chief minister-i anir government-i timi yimsü mesütetba agi ataloker nung, chief ministeri anir yimjung mapa inyaksü nungloktsüba tangatetbaji tabensabo masü. Ashiko, Pakistan ama den raratsü asoshi kanga arrsangokja raratsübo ajungtsüa akok saka tang ama pei nübortem rongnung lendong tulu atalokba mapangbo tiyongtsüi ia yimjung mapa inyaksü asoshi Amit Shah-bo majungtsü. Pa ama BJP leniri lokti senden nung jembiba angadangra, linük nung yimjung aser tesünep asoshi masü saka ain adoka tangar majungba indang dang jembiba angashitsü. Iba jagi nübortem nem tesünep aser teimla agütsür masü saka ain adokdaksür aser tesempatep adokdaksür. Iba ama metsü prokba tilaka tanü asenoki Manipur nung asoa tejang tanga angur. Ashiko, tangsa tang ato kilonser Narendra Modii nübortem dang tesasaba aser temepishiba o tajung ka memetetdaksüra Manipur lendong ya Manipur nung manenteti prokshia aotsü. Tang tatar hoho nung opposition teloki kechisüdirsiüka kilo kilonseri masü saka ato kilonseri Manipur nung atalokba lendong indang pai bilemba aser metetba indang ashitsüla ta akangbaji tim dang lir. Tang yabo Manipur ya India telongjem kübok süra ato kilonseria khenbo semdang alitsüla aser kin ana tsüngda tsükchiteper süra kin ana prongla nungi lenirtem jaoka yimjung o karbo benoka jembir alitsüla. Manipur nung BJP teloki yimsü asür, anungji Miete aser Kuki nung na prongla BJP MLA aser pusemer teimba, anungji BJP atemabo kinunger o kinunger na tsüngda jembir amai asütsü. Ajisüaka, iba ama shisabolu mapang Manipur nung BJP MLA-temi ato kilonser Narendra Modi majurutetba aser Manipur BJP MLA teti asoshi lemdatsüsa teloki kanga mejungi züker Delhi mozü kidang mongaka, BJP leniri tesünep o shia mesemdangtetbaji meimchir shisatsü agi angatetsübo makoker. Nisung noklang ana junga asür, ki noklang aika rongdoktsür, tetsür mang agi raraba oset kümer kangshir, tenla kitem ajak temshia rongdoktsür, saka ola madoker! Ya akhi masü, ano lendong tuluba-ang ka ataloktsüa akok!

OLEMSABANG TEMULUNGER SEPAI

- P. Renthly Jamir

(Yashi adok nungi...)

Idangji retired tesayur ka mission kibura inyaker Dikon-a inyaker aser dang party ka nung kimen inyaker pa jia aru shin O nungbo putir khen inyakra pa Teti atema Putir ta shia lir. Pastortem aikati ita sen agi tenük masüng nünngünger aser tenla kidang Alushajak aser Labunartema Pai mesür ta pai sayuba tazüngla kümdaktsür. Missouri well Kansas yimti Pastor Carlton Funderburke Pai 22-8-2020 tenla kidang pulpit nungi par arogo pur dang temeyong agi tulokja arogoi kü nem Movado watch ka malitsüteter nenoki jenjangji memetet ta rara. Iba watch ya U.S dollar 3000 jenjang lir. India sen 230000/- Yisu asoshi temulunger Sepai Kasa ano 2022 October nung Louisiana Pastor Charles I Southal III arogo sen dollar 889565 meshitaki amshiba tai nangzük aser bushitepa aonung dollar 900000 menoktsü adokba 8-5-2023 jaili küm 5 atema yok.

Asenokbo kecha masü ta nübanga yutsür. Tepo kümteper tagir ajungba tachir ajungba ta ashir. Ibai kechiba tuteta zülur ta süra Tzünglu marudang shi bushi ama Sepaitem kümdanga alitsü atema lir. Arogo aika nung teloki mulung lemteta tenla ki asütsü committee shimtsüba arogo rest house asütsü, fellowship tenla ki benjar tasen asütsü luden balala shimtsüba yamala nung aiben temaibo matoker telung nungbo mokozi alonger ta angashir. Yabo lokti temelaba magiyonga tasür Dikontemi tashi tali amshiba, ya atemabo Dikon board dang masüngdangyonga ta yinjong dismantle, tokta tejen lema agiba ano oset aliba nung cash memo tai amshiba Dikon karbo sen lakh ana asem temenoktsü adokba otsüa lir. North India arogo indang oset yoka achiba Bishop Peter Baldev aser pa den pongsemer parnok nisung 16 sen 10,000 nisung shia agiba 15-7-2019 court nung case agütsüba osang kakat nung liasü. Tang Aor Pentecostal tamanger telok yutsür Baptist telok aser Revival telok arogo tentet Paika lir. ABAM kübok Ao arogo ajak agi 167 lir. Ano tenüng junga mejatetba fellowship arogo 13 lir. Baptist arogopur pastor 180 lir. Ano Aor revival arogo 14 lir. Tang Aor Baptist aser Revival arogo ajak meyojteper pastor 194 lir. Ano yangji pei arogo saseb nung fellowship pastor aika lir. Sepai kaji pa training agidangyongi tepok azüoker taküm azüoker. Aji oda Yisu asoshi temulunger Sepai inyaksü theology azünger Mizo nung Sang Niam Thanga indang osang kakat nung yamai angu. Student of Theology finds his calling indrug trade. Pa tajaba mim mozü shishiba nung angu. Pa divinity azünger saka Myanmar nungi Shillong O Calcutta tsüngda drug chia shibelena ayokba apu. Ano theology student Yilobemo Mozhui Dimapur nung Küm 17 Tain tetsür ka tepsetba atema apuba ajaki meteta lir. Asenok Aor Lanur Youth Director kati nashi chanu ka atema tangar dang sen 5000 achiba otsüa asenoki jembir.

Alima rangben nung Yisu Asoshi Temulunger Sepai tasü ait mait tendangtsü Tsungremi 2020 küm alimai Covid-19 wara yok. Aser temulunger Sepai ajaki Covid -19 tashiji Yisu dang tashi tuluba ta bilema Covid wara tsüngdang aputaka pai ashiba anga. Covid özüng agi tenlaki ajak shebang pastortem aikati Joko tenlaki memenungrai aküm. Iba wara ya Tanzania tamangertemi dang Yisu dang nungi tashi tilaba ta noktak. Tanzania president H.E Magufuli tamangertem dang tenla ki meshibangtsü ashi. Pai ashi Covid ya asenok anema mojing mapa ka lir aser iba anema raratetsüba tesemji tenla ki dang lir. Corona virus is a devil tool against us and the only place to fight it is Church. Ano pai ashi Tamang dang amangang asen Tsüngremji Covid dang tashi tuluba. Iba wara yagi temulung lemteter sepaitem ajak tasü pelet ajaki tasütsü tsübu tongpang tamakok angu. Arogopur temeim mokonga aküm. Shillong Bethany hospital Director Dr John L.Sailo Covid agi asü aser public-i pa tasü mang Shillong Jhalupara leper nung meremdaktsü nokdang tasütsü tsubuteper Joko taremdak maka par Farm house Nongpoh Dorbar nung arem. Paibo taküm Ali tashi nübör jenti yaria kümzük. Ibai alima nung otsüsütsü ka liasü. Naga lima Ao lima ajunga nung menoknok Tulu anoktsü ta olulu jembir Jorhat nung aliba machine agi buteter ta tsübutep.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

CBCI lenirtemi Manipur nung yimjung ken o jembitsü ayongzüker



July 24, 2023 nü CBCI nungi lenirtemi Manipur nung rongdoktsüba Tenla ki ka semdangba mapang tangokba noksa nung angur.

July 25, 2023: July 23-24 anogotem nung Catholic Bishops' Conference of India (CBCI) nungi lenir kari Manipur state semdangba sülen iba state nung yimjung alitsü ayongzüker.

July 24 nü CBCI-i sangdong ka ajanga, "Onoki telok ajak dang ken o jembitsü aser India nung, talisa Manipur nung yimjung aser tesünap alitsü atema nüburtem terenlok asoshi inyaksü ayongzüker," ta metetdaksü.

CBCI Tir aser Trichur nung tongti putir, Andrews Thazhath den deputy secretary general Jervis D'Souza aser Caritas India Executive Director, Paul Moonjely nungeri Manipur semdang.

Manipur yimtiba, Imphal nung tongti putir, Dominic Lumon-i parnok meina liasü. Parnoki rara agi kongshiba tesemtem semdang.

Taküm May 3 nü Manipur nung rara tenzüka sülen tang tashi nung nisung 150 jungnüa süogo aser nisung meyrjang aika jenshiogo.

CBCI-isa, "Tesem aika azüngmeyaka aliba aser tarutsü

nunga item tesem nung nisung melitetsüsa aliba ngua temelung raksar. Oziung benokba agency temi mapang talangka ola madokba atema onoki shisabulua bilemtsür," ta metetdaksü.

"Onoki schools aser hostels kar semdangba mapang nung tanurtem tejak nung tejashi aser tetsübu angu, ajisüaka iba atemaji onok telangzüba kecha magütsütet," ta kasa sangdong nungjisa shia lir.

CBCI telok jagisa teyari oset balala agütsüba den külemi medical camp ka semzüksüogo.

Khristan melungtet telok-Caritas India-ia Catholic Relief Services aser Imphal nung aliba Arogo indang Social Services Society den senteper teyari balala agütsü.

Tang tashi nung Caritas India-i India nung sen million 30 dak tema jenjang teyari agütsüogo.

Tang civil war aliba Myanmar den kidanger, Manipur state nung May 3 nü rara adokba sülen tang tashi tensa mesüngjemeteter.

CBCI Women's

Commission-ia July 23 nü linük tesem ajaklen Arogo 132 nung longkak aitba sentong ayongzüka agiogo.

Linük yimtiba, Delhi nung tongti putir, Anil Couto-i longkak aitba sentong tenzüksüba sülen lokti tentet balala nungi tetsür noklang aikati yimdong süa jaja longkak ait.

July 23 nüsa Jharkhand state yimtiba, Ranchi nunga tamangba yimsü balala nungi lenirtemi Manipur atema sarasadem sentong ka agi.

Ranchi nung tongti putir, Felix Topo leniba nung nisung 10,000 dak tema adenshia anepdang 10:00 ako nungi tenzüka anüngdang 12:00 ako tashi ozülü balala amer Manipur nung yimjung atema sarasadem.

Manipur nung rara ajanga India nung Parliament senden junga magiteter. Tzüngluruwa mongpu Parliament tenzüka sülen July 25 nü anogo pezü abensaogo, ajisüaka opposition party temi Manipur onük nung Ato kilonser, Narendra Modi-i sangdong ka tama agütsütsüla, ta akhangba ajanga senden junga magiteter.

Uttar Pradesh nung pastor ka den Khristan trok apu

July 25, 2023: Amongnü (July 23) Uttar Pradesh nung Ghazipur district kübok Badesar yimdak Khristantem tekülem sentong tagidak mapang nung police-i tekülem sentong nokdangba sülen pastor den Khristan trok apu.

Parnoki state nung anti conversion ozüing alema inyakogo, ta tai tongloksü.

Police-i parnok tenetprongla police station-i anir aoba sülen aonung piyong ayu aser tasüngnep (July 24) local court kati anir aoba sülen judicial ket nung agütsü.

Badesar yimdak aliba Protestant James Prarthana Bhavan (Prayer Hall) nung pastor, Vinod Kumar James'er

jabaso, Vikrant Kumar John-i, "Iba ya ozü nisungtem (Khristantem) anema tiyazü nung tai tongloksüba lir," ta ashi.

July 25, 2023 nü osangbener den jembidang John-i, "Amongnü tekülem sentong tagidak mapang nung police 50 shi arua Tenla ki telungi aitba sülen sentong nokdanga liasü, aser onoki tangartem yimsü meyipdaksür ta tai tongloksü," ta metetdaksü.

Parnokisa Laishiba den Khristan kaketterm bener oadok, ta paisa metetdaksü.

Tekülem sentong nungji nisung 700 shi liasü, saka parnoki pastor den nisung trok apuba sülen tanüngba Khristantem dang kidangi oang

ta ashi.

Police-i kar tetuyuba nung inyak asütsüa akok, kechiyong tamalen right wing Hindu lenir, Jitendra Kumar-i par züngsemtem Tenla kidang jagi yoka liasü, ta John-i ashi.

Kumar-i, Pastor James-i Hokolbar aser Amongnü anogotem nung sentong ayongzüka agir aser Khristan yimsü agizüker nem sen 45,000 agütsür, ta tai tongloksü liasü.

"Ajisüaka onoki kodanga mapa mesüra sen agüja tanga yimsü memeyipdaksür," ta John-i ashi.

Nütsüing million 20 dak tema aliba Uttar Pradesh state nung nütsüing shilem 0.18 dang Khristantem lir.

ANOGO ABEN TSÜNGREM DEN

Taidok Angutsü, Taidok Agüjang

"Aser ozüi kechi koda pei tai doka lir, aji oda ozü tai tokangma"- Matt. 6:12.

Tagizükba dang nungi tagütsüba sentiba lir. Asenok menen khuret bena arur, shiba dang asenoki mejungi inyak, pai asenok nem taidok agüja nüji kümdaktsü. Ibai koda tesüngmangtsü! Yisui nütsüngtem dang Tsüngrem dang sarasademba shia taidok meshia sarasademtsü sayu. Asenoki anogo shia Tsüngrem dang anogo shia tai menar ta Yisui metetta liasü, kechiaser asenoki Tsüngrem sentsüwangshi metongtetter. Tsüngrem dang tatok memeshi asenoki anogo kata süidaktsütsü makok.

Asenoki tangar dang tai atokba ama asenok dang tai tokang ta Tsüngrem dang sarasademang, kechiaser asenoki tai atokba ama kasa lenmang nung Tsüngremi asenok dang adoktsü ta Yisui nütsüngtem dang sayu (Matt. 6:15). Tsüngrem yimyaji taidok agütsüba lir (Anitet 34:6-7). Asenok Pa nütsüng süra, Pa tsüngsü nung jajatsüla. Tsüngremi taochi makaba tsükchir dang atoktsü süra, asenok tajemba inyaksü kecha mali. Tamajung karbo tai matoktsüla ta Yisui mesayu. Tai matoktsüla ta Laishiba nung tesayuba agüja mali.

Nai kar nem taidok agütsütsü sottadokra, ne teküdem aser sarasadem amajok (Matt. 5:23-24). Ne mulungjang nung memelungi iba nungi kümdanga alitsü Tsüngrem dang asüngdangang. Ne nüngdak tatok nendaka mita aliba ajanga tangar majungji tesangwa dangi arudaktsütsü. Na Khrista ama alitsü Tsüngrem dang asüngdangang; süra na rishikangshi danga nai sarasademtetsü, "obala, parnok dang tai dokang."

Asia nungi Khristan 2500 shi Lisbon nung ayongzüker WYD nung adentsü

July 25, 2023: Asia nung aliba nung adentsü, ta youth commission secretary, putir azünger Khristantem aser iba Jade Licuanan-i metetdaksü.

Indonesia nungia nisung 45 aser Timor-Leste nungia nisung 51 WYD sentong nung adentsü.

Bangladesh nung Arogoi nisung 23 yoktsü atema telemtetba agi ajisüaka ketdangsertemi nisung tenet indang visa bo magizük.

South Korea nung aliba Arogotem nungi lanur 1,051 WYD nung adentsü atema aotsü. Korea yimtiba, Seoul nungi mezüngbuba telokbo July 19 nü apusoa ogo; parnok hopta ka dak tali sentong ka nung adenba sülen ang WYD nungji adentsü.

Myanmar dak alaka tanüngba Asia linük ajak nungi lanurtem iba sentong nungji adentsü atema aotsü. India nungia nisung 250 official tejaoker ama Portugal-i aotsü, saka India nung pei nija oa adenertema 900-1,000 shi alitsü, ta Arogo lenir kati metetdaksü.

Taküm Philippines nungia tejaoker 270 shi iba sentong lemsatepa amonger.

**AO OSHI ANGAZÜKDAK:
TANÜ ANGAZÜKTSÜBA OJANG**



Rionsanger

(n) Aor putu yimsüsübaren nung putu pungububa (fifth governing council in Ao traditional administrative system)

* Aor putu menden Kosasanger sülen **Rionsanger** putu arur.

Rishi

(v) Tera repringshi (seen by chance)

* Moaba o Asangla na oa aliba ni **rishi**.

OLONG PAITEP # 6587

15x15 crossword grid with numbers 1-17 indicating starting positions for words.

TIPILEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6586 TELANGZÜBA

TIPILEN :

- 1. Tanga, 6. Wara, 7. Rajang,
9. Anük, 10. Jenjang,
11. Alar, 14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer,
9. Anema, 10. Jabili,
11. Among, 12. Miim,
13. Anem.



MARWARI NUNGER TANANG DOKAN :

Marwari nunger kati Tanang dang ayokba dokan (Sweet shop) ka lapoker idakji inyaksü nisung ana nüngdaka osang kakat nung advertise asür.

"Tanang dokan nung inyaksü nisung ana nüngdaker. Teküpoklen agüja aliba qualification akari apply süang.

- 1. Class 10 bosa pass asütsüla.
2. Tanga dokan nung inyakba experiance kuli akatsüla.
3. Ochishir asütsüla.
4. Kanga tongtipang: Pa mesüra laji Diabetic patient asütsüla, doctor nungi iba tashidak lir ta kuli abentsüla".

~ Lilir : WhatsApp

Form for 'Tepela Tasoba Anogo' with fields for Name, Class, School, and Address.

ADHJWO-i ayongzüka Dima Hasao nung longkak aitba sentong agiogo



Assam kübok Dima Hasao district nung Mongolbarnü tetsürtem meyirejang aikati Manipur nung tetsürtem anema inyaksangshiba anema longkak aitba noksa nung angur. (July 25, 2023)

Haflong, Chiteni/July 25

(Agencies): Assam kübok Dima Hasao district nung Mongolbarnü tetsürtem meyirejang aikati Manipur nung tetsürtem anema inyaksangshiba anema longkak aitogo.

Manipur nung tetsür anema inyakba anema temaitsü ayongzüka longkak aitba sentong ya All Dima Hasao Joint Women's organisation (ADHJWO)-i ayongzüka liasü.

Mongolbarnü Iba longkak aitba sentong ya Dima Hasao district kübok Haflong jila nung ayongzüka agia liasü.

Kin balala nungi tetsürtemi Haflong jila nung iba longkak aitba sentong nung shilem agia liasü.

"Onoki Manipur nung tebur

lokto-i tetsür den kangshia medemba aser tribal tetsür ana mangsa yimtung nung süa anir senzüba aitsür," ta All Dima Hasao Joint Women's organisation (ADHJWO)-i ashi.

Parnokisa, "Onoki iba tatalokba nung akoksar alirtem atema ochi obendang akhanger," ta ashi.

Temettetsü kaji May 4 nü Manipur nung atalokba video ka Social media nung July 19 nü temai adok aser iba ajanga linük ajunga aoksadakja liasü.

Video nung Kangpokpi district nung Meitei nunger tebur telok kati Kuki tsür ana mangsa yimtung süa anir senzüba, mekongshitsü yim agi kongshiba nguogo aser tena rongnung ka den tzülu nung tashiyim agi

medemba indang osang angazükogo.

Iba video ya social media nung ayimsünga prokshiba sülen India nung lokti tentet balalai Kuki tsür ana nem ya ochi obendang agütsütsü khanga arudar.

Iba tatalokba indang jembiba mapang Manipur chief minister N Biren Singh-i, taoba ita asem tsüngda tetsürtem dak iba amala mesükba tatalokba ya aika atalokogo, ta ashi.

May 3 nü Meitei aser Kuki nungertem tsüngda mangatettep adokba sülen Manipur tang tashi mesüngjemteti lir aser nisung 100 dak tema taküm samaba sen nisung aika pei talidak ki toktsür jenshiaogo.

Tripura BJP general secretary-i pa mapa toktsü

Agartala, Chiteni/July 25

(Agencies): Tripura BJP general secretary aser Nalchar MLA Kishore Barman-i Hombarnü sangdong ka ajanga, party principle koba 'nisung ka, mapa ka' lir iba dak ajemdaker tongtibang osang ka sangdongogo.

Taruba Lok Sabha Election aser state nung bye-election atema renemshiba mapang Barman-i, BJP Tripura unit general secretary mapang nungi anentsü atema shiti agütsüogo.

BJP state tir Rajib Bhattacharya dangi yokba shiti nung Barman-i, pa taoba

mapang BJP West Bengal Pradesh indang General Secretary mapa bena aliba National BJP tir JP Nadda-i 2021 küm July 8 nü chiokba indang shisema liasü.

Paisa, taoba küm ana tsüngda Prof. Dr. Manik Saha aser Rajib Bhattacharya na lenisüba nung party General Secretary ama inyaksü atema maongka agütsüba atema kanga pelaba lemsatapa liasü.

Barman-i kanga bendanga agüja aser meranga inyakba nguua pa 2023 assembly elections nung 21-Nalchar constituency nungi candidate ama nominate

süa liasü, koba pai koka Nalchar Assembly Constituency MLA aküm.

Ajisüaka "nisung ka, mapa ka," ta party principle koba ali, iba dak ajemdaker Barman-i, BJP Tripura State General Secretary mapa toktsütsü nüngdaker ta angateta iba jenjang agiogo.

Pai, state tir dang pa indang resignation asadanga agizütsü asoshi mepeshia asüngdangogo.

BJP pur taruba election atema renemshiba mapang pai mapa toktsüba ajanga lenir tasen shimtsü asoshi maongka agütsütsü.

Myanmar nunger 700 dak tema Manipur-i aitba indang sorkari ashishi

Guwahati, Chiteni/July 25

(Agencies): July 22 aser 23 nü senzüsönpongsü atema kuli kakat tejangja maliba Myanmar nunger 718 (tanur 301) kudasür India-i aitsü mela iba indang osang tejangja ka Manipur sorkari Assam Rifles dang nungi meshiogo.

Hombar aonung menor Assam Rifles den tongtepratepba mapang Manipur chief secretary Vineet Joshi-i ashiba agi, state sorkari arrtsü anükba sepaitem dang kuli kakat tejangja maliba Myanmar nungertem Manipur-i maitdaksütsü atema jenjang tapet agitsü tetuyuba agütsüogo.

"State sorkari, kechiba aser kodaser kuli kakat tejangja bena

maliba Myanmar nunger 718 Chandel District-i aitdaksü iba ken o ya jangshitsütsü atema Assam Rifles ketdangsurtem dang osang tejangja meshiogo aser iba den ozüng alema India-i aita aliba Myanmar nunger 718 ya meyipa yoktsü tetuyuba agütsüogo," ta Joshi-i ashi.

Assam Rifles-i, Chandel district deputy commissioner dang Khompat nung mepetmsü adoker aliba ajanga refugee tasen 718 Indo-Myanmar arrtsü adena July 23 nü Chandel district ajanga Manipur-i aitogo, ta metetdaksü.

Myanmar nungertem aika Manipur-i senoka aitba ajanga security tsütsü tetsükdaksü

adokba indang süoki ia bilemba mapang ka nung tang sorkari iba jenjang agiogo.

Ita ishika tsüngda Myanmar security forces aser telungpurtem Indo-Myanmar arrtsü nung raratepa arudar aser iba ajanga nüburtem aika India-i jena aruogo.

Myanmar nungertem senoka aitba ajanga security dak sendakba nung tetsükdaksü adoktsü ta Manipur sorkari shisabulua bilemer. State nung telungpur telok aika lir aser Myanmar nungertem aitba ajanga ano iba tesem tamendakdak tamajungba kumdaksütsü ta sorkari tsüba bilemer.

Pakistan Election Commission dangi Imran Khan aru

Islamabad, Chiteni/July 25 (Agencies): Pakistan indang Election Commission ajanga bail nung magizüktettsüsa Imran Khan aputsü totuyuba agütsü, koba taoba ato kilonser anema ken o balala benokba rongnung tasenba alitsü.

Iba ken o tasenba ya Hombarñu aru, aser iba anogo Supreme Court ajanga danga ken o ka nung Khan nem bail agütsür liasü. Taoba küm April ita parliament nung no-confidence vote ka ajanga ato kilonser menden nungi atsüngdokba sülen Khan anema ken o 150 dak tema benoka lir aser item rongnung kiralongra mapa inyakba densema lir.

Khan aputsü Islamabad nung warrant agütsüba nungya pai Election Commission inyakyim mezüngmeshi asü aser taoba mapanga bail nung agizüktettsüsa pa aputsü warrant tem agüjaka commission dangi maru, ta ashi.

Khan indang Pakistan Tehreek-e-Insaf Party ajanga iba warrant noksa ya social media nung post sütsü aser Lahore nung Khan'er kidang par legal team kati agizük ta ashi.

"Election Commission of Pakistan indang notice ya Tehreek-e-Insaf Chairman kidangi aru. Iba notice ya legal team indang züngsem Advocate

Rai Muhammad Ali-i agizük. Election Commission ajanga Chairman Tehreek-e-Insaf dang July 25 nü arutsü mepishia liasü.

Ajisüaka Election Commission of Pakistan ajanga ken o ya August 2 tashi mejembi atatsü Mongulbarnü thinena liasü.

Nisar Durrani tekolakba sür züngsem pezü aliba bench kati ken o ya angadanga sülen ECP ajanga iba totuyuba ya agütsü. Tanü iba ken o jembidang Imran arua liasü, koba taoba küm October ita nungi iba ken o jembida tenzüker tang mezüngbuba alitsü.

Chief election commissioner aser election commission anema tim masüba o jembiba mechi ECP yagi PTI tekolakba, party lenir Asad Umar aser taoba information minister Chaudhry nungertem anema taoba küm ken o benoka liasü.

ECP dangi arutsü melena par asemi Elections Act 2017 indang Section 10 nung ajemdaker ECP totuyuba anema high court balala nung ken o benoka liasü, koba nung commission tashi indang shia lir. PTI lenirtemi high courts tem dang item taitsüba nungi 'declaratory relief' meshia liasü.

Saka January ita Supreme Court ajanga Imran, Chaudhry aser Umar nung anema ken o maneni jembitsü ECP dang

mela, aser June 21 nü ECP ajanga par asem anema ken o benoktsü telemtetba agi.

July 11 nü iba ken o jembidang par asem ya commission dangi maru, aser iba sülen ECP ajanga Chaudhry aser Imran aputsü totuyuba agütsü. Ajisüaka Umar'er lawyer temi pa iba ken o jembida nung medendaktsütsü asüngdanga agizüka liasü.

Tanü Imran den pa indang counsel Shoaib Shaheen, ECP bench dangi aru. ECP bench züngsem kati taoba ato kilonser anema tanü ken o benoktsü tebilemba lir, ta ashi.

Ajisüaka PTI tekolakba indang counsel ajanga ECP dang mapang atsülangtsü mepishi, kechiaser pai case record bendentsü mapang tali nungdaker ta ashi.

Iba sülen counsel-i mepishiba ECP-i agizük aser August 2 tashi ken o mejembi atatsü molung aser taruba ken o jembidang Imran Khan alitsü totuyuba agütsü.

Iba ken o jembiba sülen Imran dang osangbener temi, commission dang nai tatok meshitsü asü ta asüngdanga liasü.

Iba mapang pai "Ni tatok meshitsü nungdak ta naia bilemer asü? Ni aibelen mapa kecha meinyak nung kudasür tatok meshitsü?" ta pai langzü.

Israel sepaitemi occupied West Bank nung Palestine nunger asem tepset

Nablus, Chiteni/July 25 (Agencies): Occupied West Bank north tsütsü Israel mitkar temi Palestine nunger asem khaset, koba taoba küm tetenzüklen nungi iba tesem nung azüdokshia aruba mapang nisung asürtem tesüsaba alitsü.

"Nablus nung Israel nunger injang agi Palestine nunger asem khaset. Asürtem ya tang tashi mejangjateti lir," ta Palestinian Health Ministry ajanga Mongulbarnü ashi.

Israel army temi ashiba agi, prangbong bena aliba kiralongrar aseme Nablus nung gari ka nungi sepaitem alidak injang khaloktsü aser par sepaitemia meyiper akha.

Hamas ajanga mapang tatsüka lir nisung asem ya par telok nung züngsem lir ta ashi.

Nablus ya occupied West Bank indang commercial capital lir aser yangji Israel mitkar temi rangloker amaker.

Palestine nunger media-ibo Nablus tezülen Jewish nunger aliba tesem ka anasa Palestine nungeri amakba sülen mita atar par asem ya tepset, ta ashir.

Ambulance densema iba tesemi shinga meyoktsüsa mitkar indang gari kati lenmang nokdanga aliba Palestine TV nung sayu.

Lendong agütsür indang gari nungi M16 rifles asem den danga hadirtem ngutet, ta Israel mitkar temi ashi.

Tang occupied West Bank nungya azüdokshi tali ajurur aser

Israel sepaitemi tanen makai amaker.

Ita tetenzüklen Israel-i Jenin refugee camp nung doones amshia bomb pokloktsü aser sepaitem noklang aika arua liasü. Iba mapang tanur asem densema Palestine nunger 12 aser Israel sepaitem ka asü.

East Jerusalem aser Gaza densema taküm occupied Palestinian territories nung Palestine nunger nisung 200 dak tema tepsetogo, aser asürtem ya timba occupied West Bank nung lir.

Israel Ato Kilonser Benjamin Netanyahu'er far-right ultranationalist coalition temi Palestine nunger lenirtem jembishinü mesüner aser West Bank nung ozüng alema Jewish nunger arua aliba atema kuli meshir aser tali ang amaker.

Hokulbarnü occupied West Bank nung Israel sepaitemi Palestine nunger teburchanu ana tepseta liasü.

Tena rongnung ka ya arishi küm 17 tain Muhammad Fouad Atta al-Bayed ta Palestinian health ministry ajanga ashi aser pa dak tekolak nung akha.

Ka ya Fawzi Hani Makhalfeh liasü, shiba par medemer Mohammed Mukheimer den gari nun glia Israel sepaitemi injang khaloktsü.

Ita tetenzüklen Palestinian health ketdangsür Umm Safa-i ashiba agi, longkak aitba

mapang arishi küm 24 tain Abdel-Jawad Hamdan Saleh dak Israel sepaitemi teku nung akha.

Taoba ita ozüng alema arua alir ter dak tema occupied West Bank yimtsüng kati aita gari aser ki nung mi senlokja liasü aser aji masüdag Palestine nunger Ramallah aser Nablus yimtittem tetsüngta nung aliba petrol station ka nung Israel nunger pezü khaseta liasü.

Russia aser China ketdangsür temi North Korea semdangtsü

Pyongyang, Chiteni/July 25 (Agencies): North Korean state media agency KCNA ajanga ashiba agi, 70 buba Victory Day benjong nung adentsü asoshi Defence Minister Sergei Shoigu-i anir Russian delegation ka tan hopta North Korea semdangtsü lir.

North Korea yimtiba Pyongyang nung iba sentong nung Beijing nungi delegation ka den Chinese Communist Party Politburo züngsem Li Hongzhong-a adentsü.

1953 küm mapang tatsüka asoshi South Korea den rara anena atatsü atema tezüngzüktep ka agi aser iba nungtem nung North Korea-i küm shia July 27 nü Victory Day ya amunger.

Iba rara nungya nisung million aika tepset, koba 1950 küm China aser Soviet nati yaria North Korea-i South Korea maka tenzüker. Iba mapang United States-i South Korea

OFFICE OF THE AKHOYA SHISALUYIMER TELONGJEM Tenüngsang Agütsür



Akhoya nunger Wb. Marsosang Imsong aser Wt. Impangkoka Jamir na jabaso Sb. Merensangba Imsong pai NSSB Exam 2022 nung LDA-CUM- COMPUTER ASSISTANT, Dept Animal Husbandry & Veterinary Science nung takok tulu anguba asoshi Akhoya Shisaluyimer Telongjem-i tenüngsang aser tetushi agütsür. Tsüngremi ne taküm aser wadang ajak nung maneni moajangma.

Sd/-
Sb. Wapangtoshi K. Jamir.
President, AST

Sd/-
Kr. Asenla Imti
Gen. Secretary, AST

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA Dt. Kohima, the th July, '2023. NOTIFICATION

In pursuance to RIMS, Imphal letter No.A/197/Adm(MBBS)/RIMS/2023(Pt) dated 22nd July, 2023, applications from intending candidates belonging to the State of Nagaland for admission into MBBS course for the Academic Session 2023-24 are hereby invited for the following seats:

- (i) EWS (Economically Weaker Section) - 11 seats
- (ii) Open North East (NE) - 10 seats

The last date of submission of filled-in applications to the Dean's Office is August 19, 2023 upto 4:30 PM. Counseling is fixed tentatively on August 26, 2023 starting from 10:30AM. Scan copies of the filled-in applications along with the required testimonials may also be sent to e-mail - admissions.rims.imphal@gmail.com on or before the dateline given above.

The selection of the candidates shall be purely on the basis of merit (rank) in NEET-UG-2023

The following documents are required along with the application:

1. Domicile certificate/PRC (not the Temporary Residency Certificate)
2. Admit Card of NEET-UG Exam 2023
3. Score Card of NEET-UG Exam 2023
4. Age Proof Certificate
5. Pass Certificate of Class X and Class XII
6. Marksheet of class XII
7. EWS certificate issued by the competent authority of the State from where the domicile certificate has been issued (for those candidates applying under EWS Category)
8. Passport photograph.

N.B: Candidates are advised to check the RIMS website (www.rims.edu.in) periodically for any update.

(ER. VIPULHOU LHONGU)
Director

yaria liasü. World War II tatemi Russia aser US nati iba tzümeketli ana kuma sadangtsür aliba North Korea lenir Kim II Sung-i tashiyim amshia lungjemdaktsütsü meranga iba rara ya tenzüker.

Ceasefire sülen taküm yagi küm 70 ajunger, koba ajanga Korean peninsula ana kuma sadang aser kibong million aika North aser South Korea tsüngta aliba Demilitarized Zone (DMZ) ajanga piladaktsü.

KCNA osang ajanga ashiba agi, taküm iba benjongmung mapang North Korea yimtiba nung military parade tuluka alitsü.

2020 küm COVID pandemic tenzükdang Pyongyang-i par arütsü ajanga shibangba sülen Victory Day benjongmung nung adentsü asoshi linüki Moscow aser Beijing ya mezüng arur alitsü.

Group of Seven (G7), European Union aser dangar temi Beijing dangi shiti ka züluba

nung Pyongyang nem China nunger tzü mamshidaktsütsü shia liasü aser iba nung telangzüba agüja Hombarñu China-ia United Nations ajanga North Korea nem tenokdanga agütsüba ajak shidak inyaker ta ashi.

Linük ana tsüngta miimshia maparen inyakba indang junga memetet, saka mapang talangka nungi Beijing-i North Korea nung Kim yimli generation asem tashi laotsü aliba nungi nokdangtsü meranga arua liasü.

June ita China nungi North Korea-i osettsüset balala bener aoba ya küm ka tejakdang dang nungi tiben agi timba liasü, aser iba mapang anogoshi nisung meyerijang-sa meyerijang dak COVID-19 puteta liasü.

Kasa mapang Ukraine nung raratsü atema North Korea-i Russia nem mitkar tsütsü teyari agütsü, ta US-i tai tongloktür, saka Pyongyang aser Moscow nati magizüker.

CAM-i ayongzüka 8buba NECDC Conclave agiogo



Dimapur, Chiteni/July 25 (TYO): Cricket Association of Mizoram-i ayongzüka 8th North-East Cricket Development Committee (NECDC) Conclave aser 2buba NECDC Achievers Nite agiogo, kong 2022-23 season nung kanga junga asayaba atema Nagaland nungi asayar pezü nem naroküm agüja liasü.

8buba NECDC Conclave aser 2buba NECDC Achievers Nite nung Mizoram Chief Minister Zoramthanga alakteta jaoker liasü.

Nagaland Cricket Association nungi delegate tem ya Hon. Secretary, Nagaland Cricket Association Hyunilo Anilo Khing lenisüba nung iba sentong nung oa shilem agi. Pa den Nagaland Cricket Association nungi ketdangsürtem aser naroküm agizükertemi iba sentong nung shilem agia liasü.

2buba NECDC Achievers Nite nung Nagaland nungi naroküm agizükba asayartem yamai alitsü:

1. Hem Bahadur Chetri - Best Bestsman (Mens U23)

2. Afzal Hussain Choudhury - Best Wicket-Keeper (Mens U23)

3. Yugandhar Singh - Best Wicket-Keeper (Mens U19)

4. Najmeen Khatun - Best Batter (Girls U15)

BCCI Domestic Season 2022-23 tepeyong asayamung balala nung kanga junga shilem agiba atema Nagaland nungi item asayar pezü nem naroküm agütsüogo, ta Nagaland Cricket Association, Media & Communication Cell sangdong ka ajanga metetdaksü.

Inter-School Athletic Meet tembangogo



Dimapur, Chiteni/July 25 (TYO): District Sports Office, Kohima District Athletic Association, and District Hub for the Empowerment of Women den longjemer Kohima District Administration-i ayongzüka Inter-School Athletic Meet tembangogo.

Iba asayamung ya "BetiBachaoBetiPadhao" campaign kübok ayongzüka asaya aser July 21 nü tembanga liasü.

Asayamung shibangba sentong nung o jembiba mapang Deputy Commissioner, Shanavas C, IAS-i, asayamung nisung shilem agir ajak dang saisapong nung temaba jenjang tongteta asayatsü atema meranga inyaksü ajungshia liasü.

Paisa, anogo ana asaya balala asayaba mapang shilem tajung agiba atema asayartem nem tenüngsang agütsü.

Iba asayamung nung

Kohima kübok aliba nija aser sorkar school 33 nungi tetsür kaketshir 300 shi-i shilem agia liasü.

Iba asayamung ya Indra Gandhi Stadium nung asaya aser iba ajanga "Save the Girl Child, Educate the Girl Child" campaign ajungkettüsüogo, koba tang mezüngbuba Kohima District nung benokogo. Iba campaign atema Deputy Commissioner office Nodal Agency lir.

BWF Rankings: Satwik aser Chirag na tanabuba jenjangi tuogo

Chiteni/July 25, 2023 (Agencies): Korea Open akokba sülen India nung tarap asaya Chirag Shetty aser Satwiksairaj Rankireddy na BWF rankings nung tanabuba jenjangi tuogo, koba tena asoshi tang tashi nung ranking tajungtiba lir.

Satwik aser Chirag na jenjang ka tejkadangi tua China nung tarap Liang Wei Keng aser Wang Chang na atsüngtokogo. Keng aser Chang na ya tenati taoba hopta Korea Open semifinal nung tsükdakja liasü.

India nung tarap yagi taküm Asian champions, Korea Open (Super 500), Swiss Open (Super 300) aser Indonesia Open (Super 1000) koka lir aser tenati tang tashi nung point 87,211 nguteta lir.

Taoba Hopta Korea Open nung taküm asoshi final pezüba nung asayaba mapang Satwik aser Chirag nati game

ka mekoki aliba nungi meyipa arur world number one tarap Fajar Alfian aser Muhamad Rian Ardianto na koka liasü.

Tena taküm final ka nung danga tamakok ngua mali aser asaya 10buba khen danga tamakok mongui asaya arudar.

Tetsür kija asaya nung PV Sindhu shiba Korea Open nung kanga kara tsüka liasü, la maneni 17buba nung lir.

Ajisüka London Olympics bronze medallist Saina Nehwalbo jenjang 37bubai asepzüka luogo.

Tebur kija asaya nung India nung asayartem rongnung HS Prannoy maneni temaba jenjang nung lir. Pa teburtem ranking nung 10buba nung lir.

Kasa mapang nung Canada Open akoksa Lakshya Sen, Korea Open nung masayaba sülen 13bubai luogo aser Kidambi Srikanth shiba tang junga masayateti arudar pa 20buba nungi masetshi lir.

Jamshedpur FC-i Japan nung Midfielder Rei Tachikawa alizükogo



Chiteni/July 25, 2023 (Agencies): Indian Super League club Jamshedpur FC-i Hombarnü sangdong ka ajanga Japan nung midfielder Rei Tachikawa den küm ka atema tenangzüktepba yangluba sangdongogo.

Arishi küm 25 tain midfielder ya Maltese club Sirens FC nungi arua adentsü, kong pa taoba season asaya 23 nung shilem agiogo aser goal ana idakja liasü.

Japan nung asayar ya Maltese Premier League nung 2019 nungi 2022 tashi küm ana Santa Lucia nungia asayaogo.

Rei ya Japan nung aso aser 2018 küm local club Osaka Uni H&SS toktsüba sülen pa Europe-i oa Portuguese club Perafita nung dena liasü.

Iba sülen pa Portuguese club Felgueiras nung oa aden aser 2019 küm Malta nung Santa Lucia nungi asayatsü atema ao.

Pa ya midfielder nung shilem balala agitetba asayar ka lir aser pai attacking position balala nunga asayateter, iba ajanga team attack tashi taitba kümdaktsür aser opposition team nem timtem aika agütsür.

"Rei Tachikawa ya nüburtemi kanga mela jangjaba asayar ka lir," ta Jamshedpur FC Head Coach Scott Cooper-i ashi.

"Pa kanga dang technical aser kara asayaba asayar ka lir, shibai tejkadangi tua tetsüng anaprongla aser tekolak agi dena goal idaktsüteter. Pai ball kanga junga pass asür aser pa dak toktepba asayaba tanüla keta lir. Pa Europe nunga asayaogo aser pa ya club atema kanga tajung asütsü ta bilemer," ta Cooper-isa shisem.

Maneni Club sangdong ka ajanga ashiba agi, taruba season nung Rei jersey number 8 asemtüsü.

BILEMDANGANG

"Anema alidang tinyaknüsü ajak inyakang."